

A introduci un schakel klas na C.G. Abraham de veer School na San Nicolas pa e alumnonan cu no ta domina Hulandes

Siman pasa, durante Conferencia di Prensa di Gobierno di Aruba, Minister di Enseñansa y Deporte Endy Croes a indica cu e aña aki a introduci un 'schakel' klas na C.G. Abraham de Veer School na San Nicolas.

Esaki ta pa 'vang op' e muchanan ya caba grandi cu nunca a haya Hulandes, cu no por bay scol basico mas y mester bay sigui trayecto di mavo. Un total di 15 alumno a inscribi pa e proyecto aki. Despues di esaki, e alumnonan por 'stroom door' pa

mavo. Esaki a acapara un cantidad di mucha cu no por a haya un cupo, paso no por domina Hulandes. "Esaki sigur ta un logro bunita. Nos ta percura pa tur mucha tin acceso na Enseñansa", e mandatario di Deporte a conclui.




CBS: CPIC a registra un caida di 2.9%

E CPIC (core inflation) – CPI excluyendo e efecto di energia y cuminda – a registra na Juli 2024 un subida di 2.9%. E indice di energia – cu ta consisti di e productonan: electricidad, awa, gasolin y diesel – a registra un caida di 2.9%.

E indice di cuminda a registra un subida di 2.4%. Kico ta CPIC? E CPIC (core inflation) of e inflacion basico ta un porcion di e inflacion unda cierto articulonan cu tin movimientonan di prijsnan volatil ta wordo exclui, manera productonan alimenticio y energetico.

Na momento cu e inflacion basico wordo calcula, e componentenan mas volatil ta




wordo elimina di e inflacion total. E indice di e inflacion basico ta sirbi pa evalua e tendencia riba medio y largo plazo di e nivel general di prijsnan.

Pa ahusta maneho monetario, hopi economista ta enfoca riba e tasa di e inflacion basico, como cu esaki ta permiti un evaluacion mas profundo

di e procesonan di inflacion reciente den e economia.

E CPIC ta wordo calcula door di compara e indice promedio di e periodo di e 12 lunanan mas reciente cu e promedio di e periodo di 12 lunanan anterior (Promedio anual).

Elaboracion di un CPI tin



tres meta principal.

1. Como un metodo di calculo pa compensa empleadonan pa motibo di perdida di poder di compra, ahustando nan salarionan, cu e proporcion di e cambio porcentual di CPI, locual ta conoci como indexering. 2. Como un mecanismo pa ahusta componentenan di e producto

domestico bruto (GDP) di termino nominal pa termino real den Cuentanan Nacionales. (Por ehempel door di elimina e efectonan di cambionan di prijs di e balor di consumo)

3. Como un medio pa gobiernonan y/of banconan central fiha obhetivonan inflacionario.



Gobierno di Aruba ta anuncia un paso importante den e esfuersonan pa proteha bienestar di nos animalnan domestico, den cuadro di e maneho pa Bienestar di Animal Aruba (MBAA) 2024-2029. Durante un rueda di prensa dialuna 26 di augustus 2024, Minister Arends a revela cu e prome version di e ley "Landsverordening Dierenwelzijn" a yega Ministerio y ta den fase di consulta.

E ley nobo na bienestar di animal ta enfoca riba tres obhetivonan principal:

Proteccion di Animalnan Domestico: Garantizando seguridad y bienestar di nos mascota na Aruba.

Penalidad y sancion pa abusador: Estableciendo medida stricto pa responsabilisa esnan cu ta comete crueldad of negligencia.

Structuracion di posesion di animal: Creando un sistema formal pa posesion di mascota pa garantisa cuidu y responsabilidad apropiada.

E ley ta consisti di varios componentenan clave pa aborda bienestar di animal den un structura legal. Registracion Obligatorio via

Minister Ursell Arends ta anuncia e proximo paso pa ley na bienestar di animal

Microchip: Tur mascota lo mester ta registra cu un microchip.

Sterilisacion Obligatorio: Doñonan lo tin cu sterilisa nan mascota.

Reglamento pa Criadornan (Breeders): Criadornan lo mester registra y cumpli cu standarnan stricto.

Responsabilidad di Cuido di Animal: Reglamento nobo lo stipula cuidu apropiado y aclaracion di responsabilidad di doño di mascota.

Aplicacion di e ley lo tuma luga den dos nivel

Handhaving Administrativo: Ministerio di Naturalesa lo ta encarga di sistema di registracion y monitorisacion di cumplimiento cu e ley pa garantisa bienestar di animal. Inspectoran den e ministerio lo wordo ekipa pa enforsa e ley, tareanan cu anteriormente tabata bou di KPA (Cuerpo Policial di Aruba). Handhaving Penal: Den casonan severo di abuso, cru-

eldad y negligencia grave di animal, e proceso hudicial lo keda bou mando di KPA y OM (Ministerio Publico). Lo aplica e Strafrechtelijk Handhaving. Ministerio ta traha di cerca cu autoridadnan pa garantisa cu esnan cu comete infraccion lo rindi cuenta na husticia rapidamente.

Minister Arends a anuncia tambe cu e ley pa bienestar di animal ta drenta fase di consulta publico. Tur stakeholders, incluyendo veterinario, KPA, DLVV, fundacionnan y miembronan di comunidad ta invita pa duna nan opinion y sugerencia. Esaki lo garantisa cu e ley ta refleha e necesidadnan di tur esnan envolvi den proteccion di animalnan na Aruba.

Cuminsando dia 2 di September 2024, e propuesta di ley lo ta disponibel pa revision riba publico.aw bou di tab "Consulta". Adicionalmente, dos con-

sulta publico lo tuma lugar na MFA Savaneta y MFA Paradera, unda miembronan di comunidad por yega personalmente pa ricibi informacion y duna nan input.

MFA Savaneta: 4 di September 2024, 6:00 PM – 7:00 PM
MFA Paradera: 6 di September 2024, 6:00 PM – 7:00 PM

E ley nobo ta bai man den man cu un campaña di conscientisacion cu ta enfoca riba educa comunidad riba importancia di ser un doño responsabel y tene empatia pa nos animalnan. E meta di campaña aki ta promove un cultura di cariño y responsabilidad pa nos mascota. Ministerio di Naturalesa a colabora cu artista local Ty Figaroa pa asina yuda comparti e mensahe pa stima nos mascotanan y ta un doño responsabel.

Minister Arends ta enfatisa cu mascota ta parti di famia. Bo cuidu y amor ta haci tur e diferencia den su bida. Stima bo mascota!